



虎尾中元祭

舊曆正月十五係上元節，七月半即係中元節。特別係七月半更加係佛教个盂蘭盆節兼道教个地官生日。在這日滿仔位攏愛拜好兄弟，放炮、做戲，七月份鬼門關開，這日頭鬧熱。尤其係虎尾个七月半攏更加鬧熱，所以有人講「北基隆南虎尾」，實在係有影。

這回中元祭，虎尾分做七區聯合來贊普，枷歸下虎尾頭大條个幾條路做一下包落來，若像超級个大夜市，滿仔位攏係人尖人，人層人。有賣食个、有賞套圈个、有射氣球个、有喝賣个。外頭緣个路肩車歇湊湊，攏無法度俵來，人實在全然多。

本底中晝个時落大雨，心肝底想講，今日暗夜討來虎尾睭明華園个歌子戲和黃俊雄大師个布袋戲，這下愛失望了。毋過有一句事講「西北雨落毋會過田塍」，來了緊，去了嘛緊。果然到下晝五點个時即歇雨啊。所以攏緊照原在个打算，食飯了後攏緊出門，駛車直接到位虎尾。遠遠即聽著放炮个聲和睭著五彩十色个煙火，得人心情做一下歡喜起來。開始逛街，睭著一擔擔个物件，和一桌桌拜好兄弟个牲儀。嘛有司公在做事，祈求大家平安，好兄弟來領受這兜牲儀和拜个物件，得人感受著虎尾个中元祭實在有鬧熱。

這夜頭多人睭係明華園歌子戲，現場有三千外人睭戲睭到煞棚正走。睭著棚嶺布景一直換，人物个身段和唱功攏全然厲害，加上心色个對事，枷現場个氣氛做一下炒起來，大家攏睭到真入戲毋盼走。等戲做到歹人得著報應，煞鼓个時，大家心肝底猶在想，毋知愛攏幾時正有這款戲好睭。佢想明年个虎尾中元祭，會有愈多人來虎尾个！

作者：李秉璋

☆詞彙學習☆

- | | |
|---|--|
| 【地官】ti guanˊ：道教中的三官之一，民間認為是舜，有地官赦罪說法。而地官生日為中元節，因此在這天普渡孤魂。 | 【喝賣个】hodˊ miˊ e：攤販之一種，常以玩具或是一些家中生活小物品做拍賣，由出價高者得之，常以送小禮物做為激發觀眾出價欲望。 |
| 【好兄弟】hooˊ shangˊ teˊ：此處指的是各方鬼魂。 | 【歇湊湊】hiedˊ neemˊ neemˊ：停滿滿的。 |
| 【贊普】zanˊ puˊ：普渡，請道士做法事及用許多祭品祭拜各方鬼魂。 | 【本底】bunˊ deˊ：原本。 |
| 【人層人】nginˊ kiabˊ nginˊ：人擠人。 | 【歇雨】hiedˊ bbuˊ：雨停了。 |
| 【套圈个】tooˊ kuenˊ e：常在夜市出現的遊戲，花 50 元可用一串藤圈在一定距離投擲攤販所排列物品，只要被藤圈所套中者就是顧客的了。 | 【牲儀】senˊ ngiˊ：用三種牲口，如豬、雞、羊等當作祭品，再加上酒即是「三牲酒禮」。 |
| | 【煞棚】sadˊ pangˊ：指的是野臺戲的戲劇演出結束。 |
| | 【煞鼓】sadˊ guˊ：煞棚的另一種說法。鼓聲停了，代表戲演完了。 |